

Garesia

Pas nda Por ai Garesiahündambo sürü papimarandi

1 ¹Ro Por-anahi. Nindou ai moai ahei hohoanimonambo wambo Kraisindi hoafi ndowandifi ngafi ndandi sei hehi kafaorihindiri mburihü koarihehindiri, nga wani. Iga Sisas Krais asu Ape God sapo yifihündi botimariri rani diboyafani wambo ahafandi hohoanimonambo ahandi hoafi semindi ho rambohünda kafaore hiniŋgi-mareandiri. ²Muŋguambo anihondümbo-rihindeimbi ndanihü ro-babidimbo aniboadei ai-amboani Kraisindi nendi Garesia hifihü amarei siheimbo hihifarihündüri.

³God sihefi Ape asu Adükari Sisas Krais ai siheimbo moani hipoambo-ndineandürühi asu ngusüfo afurife kife hohoanimo ra mbisabinandür-amboane. ⁴Sihefi moaruwai hohoanimo raguanambo-fembohünda asu nine moaruwai hohoanimo hifi ndanihü engoro ranambeahindi aboedafe-munimbohünda Krais ai sihefi Ape Godindi yifiri sünguyu ahandi fi masagado. ⁵Ranimboane asu sihiri muŋguambo si aho ra Godimbo aboed-ani mbisefi hohoanimo-ndefimboane. Iga anihond-ane.

Aboedi hoafi mami rani yanggir-ane engoro

⁶God ai siheimbo Kraisindi moani hipoambofe sünguyu diboniyu-ndürühiya, wand-anei mehuyosi, nga asu moai se gedühi hoafi ra süngurihindi. Iga asu ngorü rani-poanimbo aboedi hoafi ra süngurihindühi asu ahandi fikimi niŋgokoate-mayei. Raniyo asu ro rani-moatükuni ramarihindi ranahambo mahepünaheandi! ⁷Anihond-ane, moai ngorü rani-poanimbo aboedi hoafi yanggoro. Iga nindou bidifiri ai sihei hohoanimo ra mamikariyo wakifihi asu ai Kraisimbo aboedi

hoafi ra ŋgorü-süŋgu ŋgorü-süŋgufe wakifembo hohoanimoyomo arundi. Ranimboanahi ro ndarihe hoafayahi. ⁸Ŋga ro-aneŋi asu sünambeahindi nend-ani aboedi hoafi ra hoafinduani sapo siheimbo hefi hoafimayefi yahurai hoafikoate rani-poanimbo fiyoweimbi hoafayu ana, nindou ranahambo God ai hai ŋgoafi moaruwai raninambo koambiriheir-amboane. ⁹Siheimbo rani hoafi ra horombo hoafiyahundüreimb-anesi, ŋga asükaiya ro hapondani siheimbo hoafehandüri: Nindou ŋgorü ai ŋgu siheimbo aboedi hoafi ra, sapo horombo ro hoafimefa se anihondumbo-marihindi, yahurai hoafikoate moani rani-poanimbo hoafeyundüri ana, nindou ranahambo God ai hai ŋgoafi moaruwai raninambo koambiriheir-amboane. ¹⁰Ro ndani hoafi hoafayahi nda, nindou wambo aboed-ani yahombohündamboyo? Wani, ŋga Godimbo yaŋgir-anahi. Ro rani-moatükuni ra anihondü refembo sahehea rambarihea-mbonana, asu ro Kraisindi ratüpuriya-rihandeimbi nindouyahipoani.

Por ai Godindi hoafi semindi horambo tükümeŋiyu hoafi

¹¹Wandafi mami, awi siheimbo randihe hoafindahandüri, ro siheimbo aboedi hoafi ra ha hoafiyahandüri arihandi ranana nindou-yafe hohoanimonambo hoafiyopoani. ¹²Rani-moatükuni ra nindou-yei-mayo moai sahamindühi asu moai nindou mami ai wambo yamundeandiri, ŋga wani. Ŋga Sisas Krais ahandihoari randiri rani hoafi ra wambo weindahi-mareandiri.

¹³Ro horombo Suda-yafe Godimbo hohoanimo rani-süŋgu yaŋgiri süŋgurihandühi nimboahambe ana, ro Kraisindi nendi ranaheimbo moaruwaimbo-rihearühi müŋgunambo awarihefendürimbo hohoanimomayahi. Rani hoafi ra se horombo himboriyeimb-ane. ¹⁴Wandafi mami, Sudahündi ranahei mbusümo nindou akohoandi ro dibombo-memo ranahamumbo ŋgasündi-heapurimboanahi. Roana moani Suda-yafe hohoanimo hondü ranahambo süŋgufembo nindou hamindiyahi rani-poanimbo manimboahi. Raniyahi asu ro moani yihoefi amao-yafe hohoanimo ranimbo yaŋgiri süŋgufe hombo ŋgusüfo pamariheandi. ¹⁵Ŋga asu ro niŋgokoate-yahambeahiyo God ai wambo moani hiipoambo-reandirühi ahandi ratüpuri ratüpurimbohünda kafaore hiŋgimareandiri. ¹⁶Raniyo asu ro ahandi-mayo aboedi hoafi ra semindi ho Suda-yafe ndifo ranaheimbo bokari-hefembohünda ahandi nimori wandi hohoanimoambe ndore korimafoareandiri. Ro moai nindou ŋgorumbo-so didiboadore hoafimbiyundiri sahehea tüküyaheandi.

¹⁷Asu ro moai Serusaremnambo Kraisindi hoafi horomboyafu sowandümo homo-rundeimbi ranahamumbo sowana ndüfosimbo hahühi. Ŋga roana nimehünou Arebia hiŋinambo yaŋgiriyaŋgi ha mburiha asu asükaiya Damaskus ŋgoafina hiŋirima-riheheandi. ¹⁸Raniyo asu ŋgimi himbani hoane, rani mbusümo ro Serusarem ŋgoafinambo Pitandi-mayo

bidifiri watapori himborimbo mahahühi. Raniyahi asu ro ranihü ai-dibo yimbu wik yangiri manimboahi. ¹⁹Ranihü ro moai Adükarindi hoafi sowandümo homo-rundeimbi hoeiriheapuri, nga Sems Adükarindi akidi yangiriyu hoeimarihini. ²⁰Ro siheimbo pasambe nda anihondümboanahi hoafayahi. God ai hoafi ranahambo fifireamboani, nga ro tikai hoafiyahühi-yahipoani!

²¹Raniyahi asu süngunambo ranihünda botiyahe hehea Siria, Sirisia hifambe mahahi. ²²Asu Kraisindi nendi Sudia-yafeambe amarei ranai moai wambo ndorihififirihindiri. ²³Ŋga nindou bidifiri ai wambo hoafi yangiri himborimayei. Bidifiri ai hoafiyehiya, nindou sapo ndan-aiyu sihefimbo moaruwaimbo-reamuni marandi ranani anihondümbofo hohoanimo ra awarihefembo yahuhaya hohoanimomayu. Ŋga asu ranane haponda ai rani hoafi ra bokarimai arandi, masei. ²⁴Raniyei asu ai wandi sünguyo Godimbo aboed-ani masei.

**Por ai Adükarindi hoafi sowandümo homo-rundeimbi
nindou bidifiri babidi hohoanimo mami sünguarundi**

2 ¹14 himbani sünguna asukai hihiriyae Serusarem ngoafinambo wandafi Barnabas-dibo hahihühüyehi Taitusimbo fihimarihorimindehi. ²Ro rani ngoafina mahahühi ra God ai wambo nafuimarandir-amboyahi mahahi. Raniyahi ro ranihü tüküyahe nimboambo anihondümbo-rihindeimbi-yei bogori nindoumbo aningomo ahamumbo poanimboriheapuri mburiha ro Suda-yafe ndifo Godindi hoafi hoafiya marihandi ranahambo hoafimehapuri. Ro nine ratüpuri horombo ramariheandi asu haponda rawariheandi ranai moani ngo afurindihoemboe saheheamboyahi ramariheandi. ³Wandafi Taitus ai Grikihündüyu ro-dibo mahehi, nga asu ahambo moai sihafi fi-hoeari ra kando tindihawandi yahomo houmbo hüti-hütiruri. ⁴Tiñirifo tüküme Feyo ra tikaruhou anihondümbo-rundeimbi nahurai nindou yihoefi mbusümo dibo hasiyafu tüküyafu masifomo. Ai ramefundü ra sapo sihefimbo Krais ai Suda-yafe ahinümbi hohoanimo-ambeahindi aboedambo-mareamuna asu sihiri Krais-babidimbo aboedamboyahu animboefi. Rani hoafi hihimboriyo mburümbo asu sihefimboya, ai ahinümbi hohoanimo rani hoarehi mbiniboadei-amboane moani ratüpuriyei-rihündeimbi nou yahomo houmboemo dibo masifomo. ⁵Godindi aboedi hoafi hondü ranai siheimbo-so koadürümbo mbeyangorowa sefi hohumbo wambo asu ro moai ahamundi hoafi rani hoarehiyefi. Asu Taitusimbo fi-hoeari kefe tirihfefembo rani hoafi ahamundi-mayo ranahambo moai yini sefi, nga wani.

⁶Nindou bidifiri ahamumbo ndüreimb-anemo masei. Ai bogorimbo-efundiyo wanayomoyo ra ambe. Ŋga Godindi himboahü nindou munguambo simogod-anei. Nindou ranai moai nini simbori hoafifimbi

wandi aboedi hoafi ranifihi türu hoafiyomo, ŋga wani. ⁷Ŋga ai yaru fifirimarundi God ai wambo Suda-yafe ndifo ranaheimbo aboedi hoafi ra hoafimbohünda koamarihendiri, sapo ai Pitambo Suda ranaheimbo ahandi hoafi hoafimbohünda koamariherü nou. ⁸Ŋga sapo God ai Pitambo Suda ranaheimbo hoafi semindi ho hoafiyondüri-rambo ramariü nou ai wambo ŋginindi masendi Suda-yafe ndifo ranaheimbo Kraisimbo aboedi hoafi semindi ho hoafiyo-rambohünda.

⁹God ai ahandi aboedi hoafi hoafiyorambo rani-poanimbo ratüपुरi masendiri ra nindou ranai fifirimarundi. Raniyomo Sems, Pita, asu Son ai bogori nindoumboyafu niŋgomombo Barnabas-dibo yihoehimbo wari fumafoarümuni sihiri mami rani ratüपुरiyefi-rihundeimb-aneŋi yahomo houmbo. Raniyefi asu ro mbiro fokoakomayefi Barnabas-dibo ro Suda-yafe ndifo-yei mbusümo ratüपुरindehani asu ai Suda-yei mbusümo ratüपुरindimboemo sefi hohu. ¹⁰Ai mami hoafi yaŋgiri yihoehimbo hoafiyomondühi yahomoya, ‘Awi se nindou moaruwai rananikoate-mayei ranaheimbo-animbo farihefendürimbo hohoanimondafani,’ mehomondamboyahi asu ro amboani kameihi ranahambo refembo hihifi-hihifiyahühi hohoanimomaya hahi.

Por ai Andiok ŋgoafihü Pitandi moaruwai hohoanimo weindahimareandi

¹¹Pita ai Andiok ŋgoafihü tükümeŋiyu-amboyahi asu ro ahandi himboahü ŋginindi hoafimehando ahandi hihindi hohoanimo ranahambo. ¹²Sapo rani ŋgoafihü nindou bidifiri Sems koamariheपुरi ranai tüküfekoate-yomondambe ana, Pita ai Suda-yafe ndifo anihondümbö-rihindeimbi rani-babidimbo sahäsihü nimarü marandi. Ŋga asu nindou ranai tükümeŋfundamboyu ai Suda-yafe ndifo-babidi ranihü piyu haya moai nimarü sesü randi Sudambo yihimborapurühi wambo. ¹³Raniyomo asu Sudahündi wandafi mami bidifiri ranai Pita hohoanimomayu süŋgu hohoanimomemo. Raniyo asu ahamundi rani hohoanimo ranai Barnabasindi hohoanimo ranahambo mamikarimarira rani-süŋgumareandi. ¹⁴Raniyahi asu ro ahamumbo hoeiriheapura aboedi hoafi anihondü meŋgoro rani-nafi süŋgufe ho-rakoate-memonda, asu ro nindou muŋguambo ahei himboahü Pitambo hoafiyahandowohü sahiya, “Pita, seana Sudahünd-anafi, ŋga moai se Suda-yafe hohoanimo süŋgurowandi, ŋga Suda-yafe ndifo nahurai-anafi. Ŋga nimboe se Suda-yafe ndifo ranaheimboya, ‘Se Suda-yafe hohoanimo süŋgundihindi,’ asafi,” sa hoafimehando.

**Nindou ai Sisasimbo anihondümboarihori ana, ai
nindou mbumundi hamindi nimboemboyei**

¹⁵Ro Sudahünd-aneŋi yihoefimbo hoafayahimuni, sapo roana Suda-yafe srambeahindi tükümeŋhund-anesi. Ŋga roana yihoefi

ndifo srambeahindi ahinümbi hohoanimo süngukoate-yeimbi moai tüküyahundi, ŋga wani. ¹⁶Ro rarihu fifirihumboanefi, God aiana moai nindou düdi ahinümbi hohoanimo mengoro ra süngure huani ranimbo nindou mbumund-ani yahu randi, ŋga wani. Ŋga nindou moani Sisas Kraisimbo anihondümborihori ranaheimboani nindou mbumund-anei yahu arandi.

¹⁷God ai Sudahüнди yihoefimbo nindou mbumund-anei mbeyahumuna sefi hohu asu ro Kraisimbo anihondümborihuri hefühi ahinümbi süngukoate-yefeimbi nahurai tükümehundi nindou amuri rawehindi nou. Ŋga ranimboane asu ro randihu hoafindefihüya, ‘Krais-ana moaruwai hohoanimo nimindihani,’ mbisefi hoafimandefiyo? Ŋgiri randihu hoafindefi, ŋga wani. ¹⁸Ro mbumundi ningombohünda ahinümbi hohoanimo süngufembo ra hiningirihe mburiha asukai hihiriyaha asahamindihani ana, ro nindoumo moaruwai hohoanimoayahi ra nafuiya arihandi. ¹⁹Godindi hoarehi nimarimbohünda ahinümbi hohoanimo ranahandi sünguyo ro yifi nahurai-mayahi ranimbo-hündambo-animbo ahinümbi hohoanimo ŋgiri wambo hibadandiri.

²⁰Ranane asu ro nimi keimbi karihendeimbi-fihi Krais-dibo yifiyamboanahi, ŋga hapondanambe ana ro moai yanggiri nimboahühi wandihoari hifandirihandi, ŋga Kraisindi yanggiri ningombo hohoanimo wandi fiambe nimarimbo wambo hifandarandiri. Ranane asu Godindi Nimori ai wambo hipoamboreandiri haya nimi keimbi karihendeimbi-fihi yifimayu aboedambofe-ndirimbohünda ahandi ŋginindinambo ro yanggiri animboahi. ²¹Ro rarihe hoafiyahani moai Godindi moani hipoambofe hohoanimo ranahambo yihoaruko-riheandi. Ŋga sihiri Suda-yafe ahinümbi hohoanimo sünguarihundi raninambo sihiri Godindi himboahü mbumundi nimboefi-mbonana, asu Krais sihefimbohünda yifimayu ra moanimbore.

Ahinümbi hohoanimo süngufe asu anihondümbofe hohoanimo süngufe

3 ¹Garesiahüнди seana hohoanimokoate-anei! Nindou didai siheimbo ŋgorü-süngumarundür-amboyei se hohoanimokoate-ayeia? Ro sihei himboahü sapo Sisas Krais ai sihefimbo aboedambofe-munimbohünda nimi keimbi karihendeimbi-fihi yifimayu ra hoafimayaha se wudüpoaporihimborimayei. ²Ro siheimbo mami hoafi ndanahambo düdundaheandüri samboanahi, ŋga se wambo rani-moatükuni ra hoafindahündiri. Se Yifiafi Aboedi ra nüngurihi sahümündimboyeia? Ahinümbi hohoanimo engoro ra süngurihindühi rani-süngumbo sahümündimboyei, asu Godindi hoafi ra anihondümborihani hehi süngurihindühi sahümündimboyei nüngurihimboyeia? Anihondümbofe süngu! ³Awi se hihindi hohoanimo-yeihyeia? Se Godindi-mayo Yifiafi Aboedi ranahandi ŋginindinambo piyei hehi Kraisimbo

süngumarihori hei asu haponda se moani sihei nginindinambo rani ratüpuri ra moendimandihyo? ⁴Se horombo Godindi hoafi ranahambo semindimbo tiñirifomayehei hei, nga asu tiñirifo ra moanimbo-mandifeyo wanimandiyoy? Ro siheimbo hoafehandüri rani-moatükuni ranai ana ngiri moanimbondifeyo. ⁵Nimboe God ai siheimbo Yifafi Aboedi sagadüri asu sihei mbusümo hepünüfeimbi moatükuni ra ratüpuriyu arandi? Ra sapo se ahinümbi hohoanimo süngurihindaniyo asu ahandi hoafi himboriyeyi anihondümborihori hehi süngurihindaniyo? Anihondümbofe süngu-ane.

⁶Sapo Abraham ramefiyu ranahambo-animbo hohoanimomboane. Sapo Godindi hoafi yare hoafiyowohü yahoya, ‘Abraham ai Godimbo anihondümbomarira ai ahamboya nindou mbumund-anafi mehundo,’ meho. ⁷Awi se ranahambo ndondihi türüboadihindi, nga sapo nindou didiyeyi ai Godimbo anihondümborihori arihündi ranai ana Abrahamindi ahuri mam-anei. ⁸Horombo hondü God ai Suda-yafe ndifo ranaheimbo fifirimareandüri nindou ranai ana sünguna aboedi hoafi ra anihondümborihori ndihimboyeyi ranimboane ai ranaheimbo aiana nindou mbumundi hamind-anei mbisamboyahi mehu. Raniyo asu horombo God ai aboedi hoafi ra Abrahamimbo yare hoafimayundo sapo ahandi hoafi yare hoafiyowohü yahoya,

“Sihafi süngu-animbo süngunambo ro muṅguambo nindou ranaheimbo aboedi-aboedindi-heandürimboyahi,” *Stat 12:3*

meho. ⁹Sapo Abraham ai Godimbo anihondümbomarira God ai ahambo aboedi-aboedi-mariri nou-animbo asu nindou didiyeyi anihondümborihori ranaheimbo amboani Abrahamimbo ramefiyu nou God ai aboedi-aboedi-ndeandürimbui.

¹⁰Nindou didiyeyi hohoanimoyeyihya, ro ahinümbi hohoanimo muṅgu sünguarihundi ana, God ai yihoefimboya, ‘seana mbumund-anei,’ mbüsümbui ase ana, awi God ai aheimbo moaruwaimbo-ndearümbui. Nimboe sapo Baibor ai yare hoafiyohüya, ‘Didiyeyi muṅguambo ahinümbi hohoanimo Bukambe engoro ra mamami amboani süngukoate-aye ana, God ai nindou ranaheimbo moaruwaimbo-ndearümbui,’ meho. ¹¹Nda muṅguambo fifirihimboane ahinümbi hohoanimo süngufe rani nimindi süngu ngiri nindou ai Godindi himboahü mbumundi nüngu. Rani-moatükuni ra sapo Godindi hoafi yare hoafiyowohü yahoya, ‘Nindou düdi ai Godimbo anihondümborihori ranai-animbo Godindi himboahü nindou mbumundi tükündüfi nüngumbui,’ meho. ¹²Iṅga asu ahinümbi hohoanimo ranai ana anihondümbofe hohoanimo rani-dibo simogodi-yafepoani. Sapo Baibor ai yare hoafiyowohü yahoya, ‘Nindou düdi ahinümbi hohoanimo sünguaru hu-animbo yangiri nüngumbui,’ meho.

¹³Sihiri ngiri muṅguambo ahinümbi hohoanimo süngundihundi, nga ranimboane asu sihiri moaruwaimbo-ndahumboyefi. Iṅga Kraisi ai sihefimbo moaruwaimbo-fembo ranambehindi aboedambo-

femunimbohünda ai moaruwaimbo-mefiyu. Sapo Godindi hoafi yare hoafiyowohü yahoya, 'Nindou daboe ahambo hifikoeffembohünda kambohoni-fihi pararihori ana, ahambo God ai moaruwaimbo-ndirümbui,' meho. ¹⁴ God ai Abrahamimbo aboedi-aboedife hohoanimo masagado ranahandihündiyo Sisas Kraisindi süngu Suda-yafe ndifo aheimbo-so amboani tükümbifeyo-wamboane yahuhayamboyu aboedambo-mareandüri. Sapo horombo God ai hoafimayu süngu, sihefimboya ai Kraisimbo anihondumbo-rihindühi asu ai Yifiafi Aboedi ra mbisahümündi-amboane yahuhayamboyu ramareandi.

Ahinümbi hohoanimo ana God ai horombo hoafirea-ndeimbihündi ra ngiri raguanambo-ndeandi

¹⁵ Wandafi mami, awi nindou sihiri muṅguambo si aho ra rarihu arihundi yahurai hoafinda samboanahi: Sapo nindou yimbu ai nini-moatükunimboyo hoafi fifirine mburüna ranahambo ndeari hoaf-ane ranihüsi safandeimbi-hündi ra, asu nindou didai hoafi ranahambo ṅgorü-süṅgunde asu bidifiri hoafi ranifihitaparimanda-mündipoani, ṅga wani. ¹⁶ God ai Abraham asu ahandi nimori mami ranahafanimbo süṅgunambo aboedi moatükuni tükündifemboe yahuhaya horombo hoafimareapiri. Asu ai moai ahuri afindi ranaheimbo hoafiyu, ṅga wani. ṅga ai moani ahuri mami ranahamboyo yare hoafiyuhü yahuya, 'sihafi ahuirambo' mehu. Ahuri ranana Sisas Krai ranahamboyo yare hoafimayu. ¹⁷ Ro hoafimayahi ra yahurai-ane: Horombo God ai Abrahamimbo horombo hoafirirühi hoafi firamündi masihend-ane. ṅga asu süṅgunambo 430 himbani ai hoaniyo ranambe, ahinümbi hohoanimo ranai tükümeffeyo. Ranimboane asu ahinümbi hohoanimo süṅguni tükümeffeyo ranai ṅgiri horombo God ai hoafi firamündi masihendi ranahambo yihirinde pandeandi. Asu ṅgiri horombo God ai horombo hoafirea-ndeimbihündi ranahambo raguanambo-ndeandi. ¹⁸ Nine-moatükuni God ai sihefimbo saimbo horombo hoafimareamuni ra ahinümbi hohoanimo rani nafi süṅgu sahumindefi mbarihu-mbonana, asu sihiri sapo God ai horombo hoafimareamuni rani-süṅgu ṅgiri sahumindefi. ṅga horombo hoafi yangiri süṅguyo God ai Abrahamimbo moani aboedi-aboedimariri. ¹⁹ ṅga asu nimboe ahinümbi hohoanimo ranai tüküfe meṅgoroa? Moaruwai hohoanimo nimindi aho ranai weindahifembo-hündamboyo ahinümbi hohoanimo ra tükümeffeyo. ṅga asu ahinümbi hohoanimo ra ho-hombo rani-poanimbo nimori God ai Abrahamimbo horimbo hoafimariri ra tükümeffiyu. ṅga asu God ai ahinümbi hohoanimo sünambeahindi nendi ranahamumbo hoafimayupura asu ai Mosesimbo hoafimemonda asu Moses hoafi semündü hu semündü hu-randeimbi nindou ranai Sudambo hoafimayundüri. ²⁰ Mami nindou ahandihoari hoafimboaiyu ana, ai ṅgiri hoafi semündü hu semündü hu-randeimbimbo hoafindüdo. God ai

ahandihoari hoafiyu marandi. Iŋga God mami ai yanggiriyu Abrahamimbo horimbo hoafire masagado ranimboane asu horimbo hoafi ranai ahinümbi hohoanimo nŋgasündeamboane.

**Ahinümbi hohoanimo ranana sihefimbo Krais sowana
semindimuni hombo moangui boagiri nahurai-ane**

²¹ Ranayo ana, asu ahinümbi hohoanimo ranai sapo horombo God ai Abrahamimbo horombo hoafimareandi ranahambo hifinambomandeyo? Ai ra wani. Iŋga ahinümbi hohoanimo süngu God ai sihefimbo koadürü yanggiri nŋgombo mbasemuni-mbonana, sihiri anihondümbo Godindi himboahü mbumundi nimboefi. ²² Iŋga asu Godindi hoafi hoafiyowohü yahoya, ‘Muŋguambo nindou ranai moaruwai hohoanimondi nŋginindi rani hoareh-anei,’ meho. God ai yare hoafimayu ra sapo ai yifiriyu nindou düdi Sisas Kraisimbo anihondümbo-arihori ana, ai yanggiranimbo nini-moatükuniyo ai Abrahamimbo horombo hoafimariri ra ndahümündi-mboyei.

²³ Kraisimbo anihondümbofe hohoanimo ranai tüküfekoateyo-ambeahiyo ahinümbi hohoanimo ranai sihefimbo tüküfe kikihiramindimuni ho-hombo anihondümbofe hohoanimo ra weindahi tüküme feyo. ²⁴ Raniyo asu sihefimbo ahinümbi hohoanimo ranai sihiri Krais sowana hombohünda hifandimaramuni. Sihiri ahambo anihondümbondihurühi Godindi himboahü nindou mbumundi tüküfemböhünda hifandimaramuni. ²⁵ Ranimboane asu sihiri Kraisimbo anihondümbofe nafi ranana hapondani ndanihü engoro. Ranimboane asu nŋgiri hapondanambe ana, ahinümbi hohoanimo ranai hibadamuni nŋgo.

²⁶ Sisas Kraisimbo anihondümbofe hohoanimo rani-süngumboane muŋguambo se ai-babidi nimboeimbo asu Godindi nimorimboyahi animboei. ²⁷ Se didiyei Krais-babidi hundürimaye ranimboyei asu se ahandi hohoanimo masahümündi. ²⁸ Ranimboane asu Kraisindi nendimbofe ra Sudahünd-anei asu ahei ndifo rananei muŋguambo ra nŋgorü-poanimbo fiyeimbi-yeipoani. Nindou moani ratüpuriyeyimbi rananei asu moani aboedi-poanimbo animboei rananei ai nŋgorü-poanimbo fiyeimbi-yeipoani. Asu nimorehi, nindowenihü ai nŋgorü-poanimbo fiyeimbi-yeipoani, nŋga wani. Iŋga muŋguambo se Sisas Krais babidi animboei seana mam-anei. ²⁹ Asu se Kraisindi nend-aye ana, Abrahamindi ahuri mamindei hehi asu se nini-moatükunimboyu God ai saimbo yahuhaya horimbo hoafire masihendi ra ndahümündi-mboyei.

Sisas Kraisindi sünguyefi sihiri Godindi nimorimbomehundi

4 ¹ Iŋga hoafi ra ndahurai-ane: Nindou nimori anüŋgu ana, sapo ai ahandi afindandi-mayo muŋgu-moatükuni ra ndemümdümbui. Ai muŋgu-moatükuni hibadambuisi, nŋga asu awi ai akidouyu-ambe

ana, nggiri ai hibadandi, nga ai moani ratupuriyu-randeimbi nahurai nungumbui. ²Nindou nimori ranai akidouyu-ambe ana, ai moangui afindi asu hifandi-randeimbi ranahafandi hoarehi nungu ngumbo asu ai nini-simboaniyo afindi ai ahambo hifandimbirand-amboane mehu rani-simboani dagadombui. ³Mare yahurai safane sihiri horombo nimori akidou nahurai hifi ndanihundambo moatukuni ranahandi moani ratupuriyefeimbi manimboefi. ⁴⁻⁵Ŋga asu ndeara si ra tukufembo yanggiriyoambeyo God ai ahandi Nimori ra hifina koamaritheru. Nimorehi ai ahambo wakimarimindo asu ai Suda-yomondi ahinumbi hohoanimo mengoro rani-hoarehi manungu. Nindou didiyei ai ahinumbi hohoanimo rani-hoarehi animboei ranaheimbo aboedambo-fembohunda God ai ahambo koamaritheru. Rananimbo asu sihiri Godindi nimorimbondahu burindemboyefi. ⁶God ai sihefimboya, ai wandi nimori-mbeyeiamboane yahuhayamboyu. Ranimboane asu ahandi Nimorindi Yifiafi sihefi ngusufoambe koamarihendi, sapo Yifiafi ranai ramareamuna sihiri Ape, wandi Ape, sefi arihundi. ⁷Ranimbo-hundamboane asu se hapondani ana nindou ngorundi moani ratupuriyei-rihundeimbi nindou-yeipoani, nga Godindi nimor-anei. Asu se ahandi nimorimbo-mehindambo-wambo ai nini-moatukuni ahandi nimorambo napire masihendi ra dagadurimbui.

⁸Horombo maho ana awi se moai Godimbo fifirihori. Ŋga ranimboyei se God hondu ningokoate amuri godi-maye ranahei moani ratupuriyei marihundi. ⁹Ŋga asu hapondani ana se Godimbo ndorihori fifirihorimboanei. Ŋga awi asu God ai siheimbo fifirea-ndurimboani. Ranimboane asu se nimboe asukai hifi ndanihundambo moatukuni engoro ranahambo hihiriyahi aheia? Asu se nimboe hifi ndanihundambo ngginindi-koate ranahambo moani ratupuriyei-rihundeimbi ningombo hohoanimoayeia? ¹⁰Seana Suda-yafe hohoanimo sungurihinduhi rani-poanimbo si, amoamo, hoembo, yahimombo asu himbani ranahambo afindi hohoanimoyei rihunduhanei. ¹¹Roana siheimbo yhimboariharu. Ro siheimbo farihefe-ndurimbohunda ratupuri afindi tñirifoayahi ra hifini pindimboe samboanahi hohoanimoayahi.

¹²Karihasihanduri wandafi mami, ro siheimbo huti-hoafehanduri. Se awi ro ahinumbo hohoanimo sungufekoate animboahi nahuraidei. Horombo ana roambo se ahinumbi hohoanimo sungufekoate manimboei nahurai tukumeheandane. Horombo se moai wambo nini-moatukuni moaruwai hohoanimoyahundiri, nga wani. ¹³Wambo angunnambo-marandira siheimbo sowahi boatei suhi aboedi hoafi siheimbo hoafimehandura se fifirarihindi. ¹⁴Wandi fiambe ra moai ndoreandiri asu se ranimboyei tñirifomaye, nga asu se wambo moai daboadi hihirihindiruhimbo yihoaruko-rihindiri, nga wani. Ŋga se moani wambo masahumundi-ndiri Godindi-mayo sunambeahindi nendiyu asu Sisas Krai ahandihoariyu semindimbo nou. ¹⁵Se rani-simboani wambohunda

hihifi-hihifimayei, nga haponda asu hihifi-hihifi ra nahana? Horombo se wambo fehefembo afindi hohoanimomayei. Nga asu se sihei himboari ra himindimbombe-mbonana, se wambo hürühümündi sehi. ¹⁶Awi ro siheimbo aboedi hoafi ra anihondümbo hoafayahandüri ra ro sihei hürütümbi-mbaiyahiyo ndane?

¹⁷Yini, nindou bidifiri ai ahamundi hohoanimo süngufembohünda siheimbo hühümaründüri hoangomosi, nga aboedi hohoanimokoate-yomondühi ramarundüri. Nga ai ramefundi ra siheimboya, Por mamimbo daboadi hihirihipurühi asu yihoefimbo nginindi süngumbihimuna yahomo houmboemo. ¹⁸Sihiri nindou fehefembo afindi hohoanimondefani ra aboed-ane. Munguambo si se randihindi ro se-babidimbo niŋgokoate-yahambe amboani. ¹⁹Wandi nimori mami, sapo nimorehi ai nimori wakemindimbo nimini nimarimbo asübusimboayo yahurai-ane wandi ngusüfoambe asübusi amaro. Ro moani yahurai hamind-animbo siheimbo asübusimbonda nga-ŋgambo se Godindi nimori Sisas Krai nahurai tükündahimboyei. ²⁰Karihasihandüri, haponda ro se-babidimbo niŋgombo afindi hohoanimoayahi. Awi asükai siheimbo afurindihe hoafindahandüri samboanahi. Awi hapondanambe ana ro sihei hohoanimo ranahambo ngusüfo afindi kürüheamboanahi.

Hagar Sara-yafe kafeefe hoafi

²¹Awi haponda ro nindou se didiyei ahinümbi hohoanimo engoro ranahandi hoarehi nimboefimbo ase siheimbo düdundaheandüri samboanahi: Awi se ahinümbi hohoanimo ranai hoafimayo ra himborikoate-wamboyei? ²²Sapo Baiborambe yare hoafiyowohü yahoya, Abraham ai nindowenihi nimori yimbumarapiri. Ngörü nimorehi moani ratüpurio-randeimbindiyu asu ngörü ahandi nimorehi hondündimayu. ²³Abrahamindi nimori ra nimorehi moani ratüpurio-randeimbi Hagarindi-mayu ranai koadürü nimori wakirihümündi arihündi süngu tüküme fiyu. Nga asu nimorehi aboedi niŋgo-randeimbi Sarandi-mayu ranai God horombo hoafimareandi rani-süngu tüküme fiyu. ²⁴Hoafi ai yare hoafimayo ranahambo refe türüfoefemboane, nga kafeefe hoaf-ane ra. Nimorehi yimbu ra God ahandi nindou-babidi hoafi femindi asihefeyo yahurai-anafe. Ngörü hoafi femindi asihefeyo ranana God ai Mosesimbo ahinümbi hohoanimo masagado nahurai Sainai wafu amaro ranahand-ane. Sainai wafuwami Moses ai ahinümbi hohoanimo masemündu. Asu nindou ranai ahinümbi hohoanimo rani hoarehi nimoreimbo moani ratüpurioyei-rihündeimbi nahurai-anei. Ranimboane Hagar ai ahinümbi hohoanimo hoafi femindi asihefeyo nahurai-ane. ²⁵Hagar ai Sainai Arebia-yomondi hifi wafu asu Suda-yomondi adükari ngoafi Serusarem nahurai-ane. Ranimboane asu Serusarem ngoafi ranai nindou rani ngoafihü amarei rani-babidimbo ahinümbi hohoanimondi hoarehi moani

ratüpuriyei-rihündeimb-anei. ²⁶Ŋga asu ŋgorü Serusarem sünambe ananjo ranai ana moani aboedi nimari-randeimbi ŋgoaf-ane. Ŋgoafi ranai ana anihondumbo-rihundeimbi sihefi me-ane. ²⁷Baiborambe yare hoafiyowohü yahoya,

“Nimorehi ra seana hihifi-hihifiyafi.

Serusarem se hihifi-hihifiyafi.

Se nimori wakemindikoate nahurai-anafi.

Se heiründafühi asu hihifi-hihifindafühi hoafi puküna hoafindafi.

Se nimori wakemindimbo simboani asübusi afindi
semindikoate-ayafi.

Se nimorehi nindowenihi hiniŋgireandeimbi nahurai-anafi,

ŋga se nimorehi nindoweniheimbi aheimbo ŋgasündiwori hawa
nimori afindeimbi-ndamboyafi,”

Aisaia 54:1

meho.

²⁸Wandafi mami, seana Aisak nou Godindi nimor-anei horombo Abrahamimbo horombo hoafimareandi süngu. ²⁹Ŋga asu nimori mami sapo hondi ai nindou sihefi hohoanimo süngu wakimarimindo ranaiyu nimorehi nimori Yifafi Aboedindi ŋginindi süngu wakimarimindo ranahambo tiŋirifo masagado. Hapondani amboani mami yahurai ahinümbi hohoanimo süngurihindeimbi ai anihondumbo-rihindeimbi aheimbo tiŋirifo sahündüri arihündi. ³⁰Ŋga asu Baiborambe hoafi ra nünŋure hoafiyowa? Ai yare hoafiyowohü yahoya, ‘Nimorehi moani ratüpuriyo-randeimbi ra ahandi nimori rani-dibo hefoarhipiri. Ŋga ahandi-mayu nimori ranai ana ŋgiri afindandi-mayo napo nimorehi aboedi niŋgo-randeimbindi-mayu rani-dibo yibobondandifani,’ meho. ³¹Wandafi mami, muŋgu-moatükuni sihiri rani nimindihündi fifirarihündi ana, moani ratüpuriyo-randeimbi nimorehi ranahandi nimoriyefipoani, ŋga sihiri ana nimorehi aboedi niŋgoweimbindi nimor-anehi.

Sihiri aboedi animboefi yahurai yangiri nimboefimboane

5 ¹Sihiri aboedi niŋgombohünda Sisas Krai ai sihefimbo ahinümbi hohoanimo-ambeahindi aboedambo-mareamuni. Ranimbo-hündamboane asu se ŋginindhümündi nimboei. Ŋga asu se asükaindei ahinümbi hohoanimo rani hoarehi moani ratüpuriyei-rihündeimbi tükündahimboyei.

²Se himborindei! Ro Por-anahi nda siheimbo ndarihe hoafehandüri. Se ahinümbi hohoanimo süngufembohünda sihamundihoari fi-hoeari ra kefe tirihefe hohoanimo sünguarundi ana, Sisas Krai ai ŋgiri sihamumbo fandihepuri, ŋga wani. ³Nindou düdi ai ahandi fi-hoeari ra kare tirarihoayu ana, awi ro ahambo ahini hoafehando: Asu se rani hohoanimo sünguarandi ana, se ahinümbi hohoanimo

munguambo engoro ra kameih-animbo süngunda ngafi. ⁴Ŋga asu ahinümbi hohoanimo ra süngufeyoani ranimbohünda God ai siheimbo mbumund-anei mbeyahua sei hehi hohoanimoaye ana, awi se Kraisimbo hinjirihorühi asu Godindi moani hipoambofe hohoanimo ra ngiri siheimbo fandihendüri. ⁵Ŋga ro Yifafi Aboedi ranahandi nginindinamboanefi Godimbo anihondumbo-rihurühi yihoefimbo nindou mbumund-anei mbeyahumuni sefi hohu ranahambo himboayefi. ⁶Ŋga asu nindou ai Sisas Krais diboehindi ana, fi-hoeari kefe tirihefe hohoanimo-ane asu nindou fi-hoeari kefe tirihefekoate hohoanimo-ane ranana awi moanane yahomboane. Ŋga anihondumbofe hohoanimo ai nindou ngorumbo ngusüfo pefe hohoanimo ranahambo botareandi ana, rani hohoanimo ra ai ndorihoeimbi hamind-ane.

⁷Se horombo ana Kraisindi hohoanimo rasüngu aboedi maheiyu! Ŋga asu düdi nimori ai siheimbo raninafi ra gümareandüra asu se anihondü hohoanimo ra süngufekoate-mayeia? ⁸God sapo siheimbo wand-anei mehu ranai moai nafi güreandüri. Ŋga wani. ⁹Hibadihümbu! Akidou hihindi hohoanimo ra afindi nindou-yafe hohoanimo mamikarindandürimboe tapoko akidou sesambe apaiaro ana, asu sesi mungu hühüti yangiri nahuraiyohane. ¹⁰Se Krais-dibo manimboei-amboanahi asu ro yarihe hohoanimoayahi, ngiri se ngorü hohoanimo ndahümündi, ngga wandi hohoanimo-animbo ndahümündi-mboyei, asahi. Nindou düdi ai sihei hohoanimo haponda ngorü-süngu ngorü-sünguarandüri ranana God ai ahambo tijirifo dagadombui.

¹¹Ŋga wandafi mami, ro fi-hoeari kefe tirihefe hoafi ra bokarihehe-mbarihi hahi-mbonana, asu wambo ngiri moaruwaimbo-rundiri. Ŋga ro hoafi ra bokarihehe-mbarihi hahi-mbonana, asu ro Krais ai nimi keimbi karihendeimbi-fihi yifimayu ranahambo bokarihehe arihandi rananimbo Suda ai ngiri ngusüfoambe yihoaruko-rihindiri. ¹²Nindou didiyei sihei hohoanimo ra ngorü-süngu ngorü-süngu arundi ranai ana, awi ai ahamundihoari fi-hoeari yangiri karu tirihoemo asu timoefi kameihi kambirupur-amboane.

¹³Wandafi mami, siheimbo ana God ai aboedambo mbnimboeia yahuhayambo sinei yahundireimb-anei. Haponda se aboedambo animbeisi, ngga asu se ranahambo ngiri hohoanimondeihi hifi ndanihündambo hohoanimo ra warindahi ndahümündi. Ŋga se simbori ngusüfo pefirindeihi fandihendüri ndühündi. ¹⁴Munguambo ahinümbi hohoanimo engoro ra hoafi mami rani nimindifih-ane türefira-mindimboayo. Ai yare hoafiyowohü yahoya, 'Se nindou ngorumbo ngusüfo pandowandi sapo se sihafi fimbo rawarowandi nou,' meho. ¹⁵Ŋga asu se nimambeahindi ninihondi buraye nou hohoanimoyeihi siheihoari simbori hoafiraye ana, awi se ranahambo hibadihümbu. Ŋga asu awi se siheihoari simbori moaruwaimbo-firindeimboyei.

Yifiafi Aboedindi hohoanimo asu hifi ndanihündambo hohoanimo

¹⁶Wandi hoafi ro hoafayahi nda ndahurai-ane. Sihei hohoanimo ra Yifiafi Aboedi ranai-animbo hifandi-mbirandüri howamboane. Rananimbo asu se ngiri horombodidi hohoanimo ngusüfoambe amarondüri ranahandi yifiri süngundihi ngei. ¹⁷Awi sihiri randihu fifirindihumboane, horombodidi hohoanimo ranai Yifiafi Aboedindi hohoanimo ra pühiyo hifinambofembo yaho haya refeyoan-ane, asu simbori Yifiafi Aboedindi hohoanimo ranai horombodidi ngusüfoambe hohoanimo hifinambofembo hohoanimoayo. Rananafe yimbu moatükuni ranai simbori nginindürefe hafe. Ranimboane nini-moatükuni se refembo sei hehi hohoanimoaye ra ngiri randihindi. ¹⁸Siheimbo Yifiafi Aboedi ranai semindindüri aho ana, asu se ahinümbi hohoanimo ranahandi hoarehiyeipoani.

¹⁹⁻²¹Horombodidi ngusüfoambe hohoanimo ranana se fifirihimboane. Rani-moatükuni ra ndahurai-ane: Nimorehi sisihimo hohoanimo, nindowenihi birabiri hohoanimo, ngusüfoambe moaruwai botife hohoanimo, tikai godimbo hohoanimombo, sanendi kabomombo didibafife hohoanimo, yiboarukofe hohoanimo, hohoanife hohoanimo, watikoafi hohoanimo, dibokori hohoanimo, simbori hoafi hohoanimo, yikürübürihefe nimari hohoanimo, ngorumbo ngusüfoambe moaruwaimbofe hohoanimo, bia simindi hohoanimo, patiambe bia simindi hefe ho hohoanimo, rahurai hohoanimo aho ra. Horombo siheimbo hoafimehandüri yahurai-ane asükaiya ahini hoafehandüri. Munguambo nindou ai yahurai hohoanimo sünguarihi hei ana, ai ngiri God nginindi hifandarandi ranambe ngei, nga wani.

²²⁻²³Ŋga asu Yifiafi Aboedi aiana aboedi hohoanimo ndahurai ngusüfoambe botire randühane. Ŋgusüfo pefe hohoanimo, hihifi-hihifi hohoanimo, ngusüfoambe afurife kife hohoanimo, nindou ngorü ai sihefimbo moaruwaimbo-rihimunani ambirihümuni yaho hohoanimo, fehefe hohoanimo, nindou ndondofe hohoanimo, asu moani aboedi mbumundi ho hohoanimo, hiniŋgirou safi niŋgo hohoanimo, hohoanimo ndofe kife hohoanimo aho ra. Moai ahinümbi hohoanimo mam-amboani rani hohoanimo ranahambo yowani yaho, nga wani. ²⁴Nindou didiyei ai Kraisindaye ana, ai ahei horombodidi ngusüfoambe hohoanimo ra ahandi yifiri asu hohoanife hohoanimo rani kameihi raguambo-marihind-ane. ²⁵Yifiafi Aboedi ranai sihefimbo yangiri niŋgo hohoanimo masemuni. Ranimboane asu randihu hiniŋgindihunda Yifiafi Aboedi ai sihefi hohoanimo ra hifandimbira howamboane. ²⁶Awi ngiri sihefi fi ranahambo moani hoanŋgirindihu sihiri borindefi. Asu ngiri nindou ngoründi ngusüfoambe moaruwaimbo-fembohünda hohoanimo botindihundi. Asu ngiri ngorumbo ngusüfoambe moaruwaindefühi hohoanimo-mbondefi.

Sihiri simbori farihefiri-ndefomboane

6 ¹Wandafi mami, asu nindou ngorü ai moaruwai hohoanimo ranambo himondarimindo ana, nindou sapo didiyei Yifiafi Aboedindi hohoanimo sünguri-hindeimbi se nindou ranahambo wari hoafendühi aboedi ndondondihori hiniñgindihori. Randihindühi asu se siheihoari hibadihümbo, nga asu rani hohoanimo ranai siheimbo amboani rande hoeindeandürani moaruwai hohoanimo-ndeimboyei. ²Se nindou ngorümbo tiñirifo tükefeyo ra simbori farihefirüdei. Rani süngumbo-animbo asu se Kraisindi-mayo ahinümbi hohoanimo engoro ra süngundihimboyei. ³Nindou mami ai ndürikoate-ani, nga ai ro ndürümb-anahi, ehu ana, nindou ranai ahandi fimbo wosihofori hoafiyuhani. ⁴Nindou mamami siheihoar-animbo nine hohoanimo ranahambo aboediyo moaruwaiyo rawariheandi mbisei hehi türüboadihindi. Nga se sihei hohoanimo nindou ngorüdi hohoanimo ra mamühindihini yibobondihimboyei. Asu se siheihoari nini-moatükuniyo ramarihindi ranahambo hihifi-hihifindeimboyei. ⁵Nimboe nindou muñguambo mamami ai aheihoar-animbo ahei ratüpuri ranahambo wudipoaporihini hifandimbirihünd-amboane.

⁶Nindou düdi Godindi hoafi yamunde-randeimbimayu ahandi yamundea-ndüreimbi ahambo bidifiri napo mbisahündo-wamboane.

⁷Awi se siheihoari sihei fi ranahambo tikai hoafindeimboyei. Nindou didai-amboani ngiri Godimbo tikai hoafindundo. Nindou nini-moatükuni mañgiri nümbür-ambe hifareandi ana, asu süngunambo mare hifimareandi yahurai-animbo asükaindu hündihembui. ⁸Nindou ranai nine moaruwai hohoanimo mañgiri nahurai hifareandi ana, yifayu amboani süngunambo rahurai safindowani hündihembui. Nga asu ai Yifiafi Aboedi ranahandi nginindinambo aboedi hohoanimo hifareandi ana, asu süngunambo ai Yifiafi Aboedi raninambo yangiri koadürümbo-koadürümbo niñgoweimbi safindowani hündihembui. ⁹Ranimboane awi sihiri aboedi mbumundi hamindi ratüpuri ranahambo refembo garibipoani. Sihiri ranimbo garibikoate rani-fihi hamindi tütüngarihundi raninambo süngunambo ranahandambohündi sesi ranai safindowani aboedi hündihehumboyei. ¹⁰Ranimboane nini-simboaniyo sihiri nindou amurambo fehefendürimboayo, rasüngundi-hurimboane. Randihu-ndühindowani sapo wandafi mami didiyei Adükarimbo anihondümbo-rihoreimbi aheimbo rani-poanimbo hamindi fandihuhu-ndürimboane.

**Por ai Kraisi yifiyuweimbi nimi keimbi
karihendeimbi ranahambo hihifi-hihifayu**

¹¹Hoafi nda ro wandihoari sürü paparihandi. Se hoeindihindi ro wandihoari sürü boagiri-boagiri pamaritheandi.

¹²Nindou bidifiri ai sihamumbo fi-hoeari karu tirihou yahomo hūti-hūtiarūpuri rananimbo Suda ai aboed-anemo mbiseiya mehomo. Nindou ranai yihimboyomondūhi yahomoya, ‘Ro Krais yihoefimbo nimi keimbi karihendeimbifihī yifimayu ranahambo yaŋgiri anihondūmbo-arihundi ana, Suda ai yihoefimbo moaruwaimbo-ndūmunimboemo,’ mehomo. ¹³Nindou ranai sapo Suda-yomondi ahinūmbi hohoanimo ra sowandūmo-ndeimb-anemosi, ŋga asu ai moai ahamundihoari rani-moatūkuni ra ndoru sūnguru homo rundi. Ŋga aiana sihamundi fi-hoeari ra kefe tirihefihū asu ranahambo borindefo yahomo houmboanemo hohoanimoayomo. ¹⁴Ŋga wandi fimbo ana, awi ro sihefi Adūkari Sisas Krais ai nimi keimbi karihendeimbi yifimayu ranahambo yaŋgir-animbo borinda ŋgamboyahi. Rani-sūnguane hifi ndanihūndambo hohoanimo ra wandi hohoanimoambe moanane asahi. Raniyahi asu ro-amboani marihe nindou hifinindi ahei hohoanimo ranimbohūnda yifimayaha nindou ai wandi hohoanimo ranahambo moanane aseī.

¹⁵Fi-hoeari kefe tirihefe hohoanimo asu fi-hoeari kefe tirihefekoate hohoanimo ra yiboboambo Godindi himboahū moanane. Ŋga sihefimbo God ai simbori nindoumboreamuni hiniŋgimareamuni ranane ai aboedi hamindi hondayo. ¹⁶Nindou muŋguambo ai rani hohoanimo engoro ra sūnguarīhi hei ranaheimbo God ai hipoambo-reandūrihi ŋgusūfo afurife kife hohoanimo mbisagadūr-amboane. Asu Godindi nendi muŋguambo ranaheimbo amboa mbisagadūr-amboane.

¹⁷Ndeara bidifiranambo hoafi hoafayahi: Nindou mami ai wambo tiŋūmbi hohoanimo ŋgiri ndendiri, ŋga yowani. Nindou ai wambo harimemondira sifo anaŋgondiri rani-sūngunambo muŋguambo fifirihindi ro Sisas Kraisindi yaŋgir-anahi.

¹⁸Wandafi mami, sihefi Adūkari Sisas Krais ai siheimbo moani hipoambo-mbireandūrimboane. Ŋga anihond-ane.